

\*1. قوم آج 76 ووں یوم جمہو ریہ منا رہی ہے۔ صدر جمہو ریہ درویدی مُرمو نے کر تو یا پتھ ور پریڈ ور سلامی لے غے یوم جمہو ریہ منایا جان مانہ قوم غی قیا دت کی۔

\*2. لیفٹنٹ گورنر منوج سنہا نے یوم جمہو ریہ غا سلسلہ مانہ مولانہ آزاد اسٹیڈیم جموں مانہ منعقد کی جان آلی یوٹی غی بڑی تقریب مانہ قومی جھنڈو چاڑھ غے مارچ پاس ور سلامی لی۔

\*3. مُلک غا دوجا حصا غی طرح جموں کشمیر یوٹی مانہ وی آج یوم جمہو ریہ حُب الوطنی غا جوش و جذبہ سنگ منایو گیو۔

\*4. تے نائب وزیر اعلیٰ سریندر کمار چودھری نے سرینگر بخشی اسٹیڈیم مانہ منعقد یوم جمہو ریہ غی تقریب مانہ جھنڈو چاڑھ غے مارچ پاس ور سلامی لی۔

\*\*\*\*\*

خبران غی تفصیل نال پہلاں باغ علی طاہر۔

### R.D. National

قوم آج 76 ووں یوم جمہو ریہ منا رہی ہے۔ صدر جمہو ریہ درویدی مُرمو نے کر تو یا پتھ نوئی دہلی تیں یوم جمہو ریہ منایا جان مانہ قوم غی قیا دت کی۔ یوم جمہو ریہ غی تقریب وزیر اعظم نریندر مودی غی طرفوں قومی جنگی یا دگار ور پُھلاں غا نڈارنہ سنگ شروع ہو گئی۔ صدر جمہو ریہ درویدی مُرمو، انڈونیشیا غا صدر پرابووو سویا نٹو غے ہمراہ اک روائتی بگئی مانہ سوار ہو غے کرتویا پتھ پُجیں۔ انڈونیشیائی صدر پرابووو سو بیا نٹو پریڈ مانہ مہمان خصوصی غا طور ور شامل ہوا۔ قومی ترانو گایا جان غے بعد قومی جھنڈو لہرایو گیو، جس نانہ 105 ایم ایم غی 21 لا نٹ فیلڈ گناں غی سلامی دتی گئی۔ پریڈ غو باقاعدہ آغاز 3 سو فنکاراں غی طرفوں موسیقی سنگ گایا گیا قومی ترانہ ”سارے جہاں سے اچھا“ سنگ ہوو۔ پریڈ ور 129 بیلی کا پٹر یونٹ غا ایم آئی 17 ون وی بیلی کا پٹراں غی طرفوں پُھل برسایا گیا۔ یوم جمہو ریہ غی اس قومی تقریب غے دوران ٹی 90 بشما ٹنک، ناگ میزائل سسٹم، بی ایم پی 2 سراتھ، براہموس، پنیاکاکشیر لا نچر راکٹ نظام، آگنی بان کثیر بیرل راکٹ لا نچر، آکاش سسٹم، مربوط جنگی نگرانی نظام، چپیک گڈی تے لانٹ خصوصی گڈی بچرنگ غو کرتویا پاتھ ور مظاہرہ کیو گیو۔

\*\*\*\*\*

### RD Tableax

یوم جمہو ریہ غی تقریب مانہ انڈونیشیا غا 160 ممبر مارچنگ دستا تے 190 ممبریبنڈ دستہ نے وی شرکت کی ہے۔ بکھ بکھ ریاستاں، مرکزی غے زیر انتظام علاقاں تے مرکزی سرکار غی بکھ بکھ وزارتیں تے محکماں غی طرفوں اس موقعہ ور سورنم بھارت وراثت اورروکاس غا عنوان سنگ بکھ بکھ چانکیں پیش کی گئیں۔ یوم جمہو ریہ غی تقریب مانہ پہلی وی یکجہتی غو جذبہ ظاہر کرن آلا سہہ خدماتی چانکی وی کرتویا پتھ ور پیش کی گئی۔ ہریانہ غی چانکی مانہ بھگود گپتا جد کہ اتر پردیش غی چانکی مانہ مہا کُنہہ سال 2025 غی چانکی پیش کی گئی۔ یوم جمہو ریہ غی یاہ تقریب 47 انٹر کرافٹس غا فلائی پاسٹ سنگ اختتام پزیر ہو گئی۔ فلائی پاسٹ غا اس ہوائی مظاہرہ مانہ رفائل ایس یو 30، جگوار، سی 130، ڈورنر 228، تے 32 انٹر کرافٹ تیں علا وہ اپاچی تے ایم آئی 17 بیلی کا پٹراں نے شرکت کی۔ یوم جمہو ریہ غی اس تقریب 34 ضمراں مانہ 10 ہزار خصوصی مہماناں نے شرکت کی۔ جن مانہ بکھ بکھ گرائیاں تیں آیا سرینچ وی شامل ہیں۔ اس توں علا وہ ہتھ کھڈی تے دستکاری سنگ منسلک افراد، ایس ایچ جی ممبر، آشا تے آنگن واڑی ورکر تے سڑک تعمیر سنگ منسلک ورکر وی تقریب مانہ مدعو کیا گیا تھا۔

\*\*\*\*\*

## RD Jammu

جموں ڈویژن مانہہ وی اج 76 ووں یوم جمہو ریہ حُب الوطنی غا جذبہ تے روانتی جوش سنگ منایو گیو۔ تگڑا حفاظتی بندوبست غے دوران لوکاں نے یوم جمہو ریہ غی تقریبات مانہہ بڑی سرگرمی سنگ شرکت کی۔ آکاش وانی جموں غا مہارا نمائندہ نے جانکاری دیتاں وں دسیو ہے جے جموں غا تمام 10 ضلعان مانہہ اس سلسلہ مانہہ ہون آلی تقریبات مانہہ طالب علماں نے بڑی گرمجوشی سنگ شرکت کرتاں وں منظر ور بکھ بکھ ثقافتی پروگرام پیش کیا۔ یوٹی سطح غی بڑی تقریب مولانہ آزاد اسٹیڈیم جموں مانہہ منعقد کی گئی۔ جت لیفٹنٹ گورنر منوج سنہا نے تقریب غی صدارت کی۔ انہاں نے قومی جھنڈو چاڑ غے پریڈ غو معائنو کیو تے سلامی لی۔ وزیر اعلیٰ عمر عبداللہ نے تقریب مانہہ مہمان خصوصی غے طور ور شرکت کی۔ اس موقعہ ور بولتاں وں لیفٹنٹ گورنر منوج سنہا نے اس طرح کہیو۔ بائٹ۔

\*\*\*\*\*

## RD Reasi

ضلع ریاسی مانہہ 76 وں یوم جمہو ریہ غی بڑی تقریب جنرل زور آور سنگھ سپورٹس اسٹیڈیم مانہہ منعقد کی گئی جت ضلع ترقیات کونسل غا چیئرسن ناگ نے قومی جھنڈو چاڑیو تے مارچ پاس ور سلامی لی۔ انہاں نے پریڈ غا معائنہ تیں علاوہ اجتماع سنگ خطاب وی کیو۔ انہاں نے یوم جمہو ریہ غی اہمیت ور لوہ پاتاں وں مجاہدین آزادی غی قربانیاں نانہہ وی یاد کیو۔ جنہاں نے بھارتی جمہوریت غا ڈھانچہ غی نین رکھی۔ انہاں نے کہیو۔ بائٹ۔

\*\*\*\*\*

## RD Samba

مُلک غا باقی حصاں غی طرح ضلع سانہہ مانہہ وی 76 وں یوم جمہو ریہ غی تقریبات منعقد کی گئیں۔ اس سلسلہ مانہہ بڑی تقریب آراضی سانہہ غی رانی سچیت سنگھ سپورٹس اسٹیڈیم مانہہ منعقد ہوئی۔ جت ضلع ترقیات کونسل سانہہ غا چیئرسن نے قومی جھنڈو چاڑھن تے مارچ پاس ور سلامی غی رسم ادا کی۔ مارچ پاس مانہہ جموں کشمیر پولیس غے علاوہ آئی آر پی، آئی ٹی بی پی، سابق فوجیاں این سی سی، این ایس ایس تے بکھ بکھ سکولان تیں آیا بچاں غا دستاں نے شرکت کی۔ اس موقعہ ور کُجھ سکیمان ور مبنی چانکیں وی پیش کی گئیں۔ ڈی سی ڈی سی چیئرمین کیشو دت شرما نے اس موقعہ ور بولتاں وں کہیو۔ بائٹ۔

\*\*\*\*\*

## RD Udhampur

ضلع اُدھم پور مانہہ وی یوم جمہو ریہ غی تقریب جوش و جذبہ سنگ منائی گئی۔ جس مانہہ جل شکتی، جنگلات تے ماحولیات اور قبائلی امور غا وزیر جاوید احمد رانا نے مہمان خصوصی غا طور ور شرکت کی۔ انہاں نے اس موقعہ ور قومی جھنڈو لہرا غے مارچ پاس ور سلامی لی۔ مارچ پاس مانہہ ضلع پولیس، ایس کے پی اے، ہوم گارڈ، این سی سی تے پولیس غا 38 دستاں نے شرکت کی۔ یاہ تقریب لڑکاں غا گورنمنٹ ڈگری کالج غا گراؤنڈ مانہہ منعقد کی گئی۔ لوکاں نانہہ 76 وں یوم جمہو ریہ غا موقعہ ور مبارکباد دیتاں وں جاوید احمد رانا نے کہیو۔ بائٹ۔

\*\*\*\*\*

مزید خبراں نال محمد مبارک ماہر۔ ور اُس تیں پہلاں یوہ پیغام۔ (یہ خبر تم آکاشوانی جموں تیں سن رہیا ہیں، تے یہ خبر مہاری ویب سائٹ نیوز آن انیر ڈاٹ گوو ڈاٹ ان ور وی دستیاب ہیں، اس (تیں یہ خبر مہاری موبائل ایپ تے ڈی ٹی ایچ ور وی دستیاب ہیں

## RD Srinagar

وادی کشمیر مانہ یوم جمہوریہ غی تمام تقریب سخت حفاظتی انتظام غے بشکار روایتی جو ش و خروش تے خوشی غے نال پُر امن طور منعقد ہوئیں۔ اس سلسلہ مانہ مرکزی تقریب غو انعقاد بخشی اسٹیڈیم سرینگر مانہ کیو گیو۔ نائب وزیر اعلیٰ سریندر کمار چودھری نے اس جگہ قومی جھنڈو چاڑیو تے نال ہی مرکزی جمہوری تہاڑا تقریب غی صدارت وی کی۔ اس موقعہ ور انہاں نے جموں کشمیر پولیس، سی آر پی ایف، بی ایس ایف، آئی ٹی بی پی، ایس ایس بی، این سی سی تے اسکولی بچاں غی پریڈ غی سلامی وی لی۔ اس موقعہ ور رنگا رنگ ثقافتی پروگرام وی پیش کیا گیا۔ اپنا خطاب غے دوران نائب وزیر اعلیٰ نے کہیو جے جموں کشمیر ہندوستان غو تاج بنیو وہ بے تے یوہ ترقی غی راہ ور لگو وہ بے۔ نائب وزیر اعلیٰ نے کہیو جے وزیر اعلیٰ عمر عبداللہ غی قیادت آلی سرکار اس جوش تے جذبہ نانہ ہور اگے بدھا وے گی۔ واضح رہ جے نائب وزیر اعلیٰ سریندر کمار چودھری نے پہلاں سرینگر غا لال چوک علاقہ مانہ واقع پرتاپ پارک مانہ شہیداں غی یادگار بلیدان ستمبہ غو دورو کر غے ات پولیس، فوج تے دوجا حفاظتی دستاں غا شہیداں نانہ خراج عقیدت پیش کیو۔ جنہاں نے ملک غی سلامتی تے سالمیت واسطے اپنی جان قربان کیں۔ مذکورہ اسٹیڈیم مانہ منعقدہ تقریب مانہ سماج غا ہر طبقہ غا لوکاں غے نال نال سرکاری افسران، سیاسی کارکنان، عام ملازماں تے اسکولی بچاں نے بدھ چڑھ غے حصولیو۔

\*\*\*\*\*

## RD Poonch

ملک پھر غی طرح ضلع پونچھ مانہ وی 76 ووں یوم جمہوریہ بڑا جوش و خروش تے قومی جذبہ سنگ منایو گیو۔ اس سلسلہ مانہ مرکزی تقریب غو انعقاد اسپورٹس اسٹیڈیم پونچھ مانہ کیو گیو۔ جت مہمان خصوصی ضلع ترقیات کونسل غی چیرپرسن تعظیم اختر نے قومی جھنڈو لہرایو تے نال ہی پریڈ غی سلامی لی۔ مذکورہ تقریب مانہ جموں کشمیر پولیس، سی آر پی ایف تے اسکولی بچاں غا دستاں نے حصولیو۔ اپنی یوم جمہوریہ تقریر مانہ تعظیم اختر نے پونچھ غا لوکاں نانہ گرمجوشی سنگ مبارکباد پیش کرتاں واں اُن آزادی پسنداں نانہ زبردست خراج عقیدت پیش کیو جن غی عظیم قربانیاں سنگ آزادی حاصل ہوئی تھی، اس موقعہ ور بولتاں واں اُن نے اس طرح کہیو۔۔۔ بانٹ۔۔

\*\*\*\*\*

## RD Rajouri

ضلع راجوری مانہ وی 76 ووں جمہوری تہاڑو بڑا جوش و خراش تے قومی جذبہ سنگ منایو گیو۔ اس سلسلہ مانہ مرکزی تقریب مذکورہ ضلع غی پولیس لائن غا میدان مانہ منعقد کی گئی۔ جت ضلع ترقیات کونسل غا چیرمین چودھری نسیم لیاقت نے قومی جھنڈو چاڑیو تے نال ہی سلامی لی۔ اپنا خطاب مانہ ضلع ترقیات کونسل غا چیرمین نے راجوری غا لوکاں نانہ دلی مبارکباد دتی اور اس تہاڑا غی اہمیت ور لو وی کہلی۔ اس موقعہ ور بولتاں واں اُن نے اس طرح کہیو۔۔۔ بانٹ

\*\*\*\*\*